

12/07/2000

ARL anjur Piala Perdana 2000

Mohd Ali Majid

KUMPULAN ARL bersedia menganjurkan satu lagi kejohanan ekuin terbesar di negara ini yang dijadualkan berlangsung di Bukit Kiara Equestrian and Country Resort, Oktober depan.

Kejohanan itu yang dinamakan `Cabaran Akhir Piala Perdana 2000' dan diadakan sempena sambutan ulang tahun Perdana Menteri Datuk Seri Dr Mahathir Mohamad, adalah susulan kejohanan pertama yang diadakan di gelanggang yang sama, 6-9 April lalu.

Pengerusi Jawatankuasa Pengelola, Abdul Razak Latif berkata, dijangka lebih 200 ekuin akan menyertai kejohanan terbesar yang disifatkan sebagai acara kemuncak sukan ekuin di tanah air tahun ini.

Katanya, penganjur juga menyediakan hadiah keseluruhan bernilai RM200,000 bagi kejohanan itu - terbesar pernah ditawarkan dalam sebarang kejohanan ekuin di rantau ini.

"Dengan adanya hadiah lumayan ini, ia diharap dapat menarik lebih ramai ekuin dari luar negara," katanya.

Antara negara yang dijangka mengambil bahagian termasuklah Thailand, Singapura, Indonesia dan Filipina.

Selain itu, katanya, buat julung kali juga kejohanan itu menawarkan hadiah bonus RM20,000 kepada pemenang cabaran akhir acara show-jumping Grand Prix dan RM5,000 untuk acara dressage.

Pihaknya juga meminta penganjur Kejohanan Ekuin Liga Asia Tenggara supaya mengiktiraf salah satu kelas di akhir kejohanan itu sebagai acara pertandingan Liga Piala Dunia, anjuran Persekutuan Ekuestrian Antarabangsa (FEI).

Menerusi penyertaan dalam kejohanan itu, ekuin juga layak diberi mata untuk membolehkan mereka memperbaiki kedudukan ranking dalam senarai FEI.

(END)